

ՎԱՅՐ ԸՆԿՆՈՂ ԱՍՏՂԵՐ

(Նմանություն)

– Հայրիկ, տէս, տէս, աստղը թռավ,
Անհետ կորավ երկընքից,
Ո՞վ էր արդյոք, որ զրկվեցավ
Կես գիշերին իր կյանքից:

5 – Ո՛հ, իմ դստրիկ, հանգիստ եղիր,
Մի հոգևոր հայր էր նա,
Գիշեր-ցերեկ մի հոգս ուներ,
Որ մեզանից փող ստանա:

Փարիսական իր գործերով
10 Աշխարհ խաբեց, զըզվեցրուց,
Այդ պատճառով Աստված նրա
Աստղի լույսը խավարցուց:

Նա ամեն բան ծախեց փողով,
Ոտքեց ամեն սըրբություն...
15 Այժմ այնտեղ ահ ու դողով
Հաշիվ կըտա Աստըծուն:

– Հայրիկ, տէս, տէս, մեկն էլ ընկավ,
Եվ չըթողեց ոչ մի գիծ,
Ասա, հայրիկ, էլ ո՞վ հանգավ
20 Ու պակասեց մեր կյանքից:

– Ո՛հ, իմ դստրիկ, խաղաղ մնա
Կեղծավորի մի աստղ էր,
Որ ձևացավ ամբողջ կյանքում
Առաքինի, ազգասեր:

25 Ամեն անգամ նա խնջույքում
Բախտ էր մաղթում խեղճերին,
Ազգի կենացն առաջարկում,
Արտասուքը աչքերին:

Բայց խեղճերը նրա ձեռքից
30 Գիշեր-ցերեկ հալածված,
Ազգին չեղավ նա կարեկից,
Ոչ ազգ գիտեր, ոչ աստված:

– Հայրիկ, տէս, տէս, աստղը թռավ,
Հետքից մի կարճ գիծ թողեց,
35 Աստղը թռավ դեպի Բաքու,
Էլ մյուս անգամ չերևեց:

– Ո՛հ, իմ դստրիկ, հանգիստ եղիր,
Այն գործիչի մի աստղ էր,
Որ իր սրտում ծնված օրից
40 Զուներ անկեղծ գործի սեր:

Նա աղմբկեց, անուն հանեց,
Սանդուղք շինեց իր ազգին...
Եվ ողջ ծաղրեց, երբ ապրում էր
Գըրպանները լի ոսկին:

45 – Հայրիկ, տէս, տէս, մեկն էլ ընկավ,
Հետքից թողեց մի ծուռ գիծ,

Ասա, հայրիկ, էլ ո՞վ հանգավ,
Աստղը պակսեց երկընթից:

– Ո՛հ, իմ դստրիկ, մի՛ վրդովվիր,
50 Մի խըմբագրի աստղ էր այն,
Որ իր թերթը տըպագրում էր
Անձի համար միմիայն:

Նա՛ կուրացած իր ցած կրքից՝
Հայհոյում էր անամոթ,
55 Եվ դորա տեղ միշտ իր ազգից
Պահանջում էր բաժանորդ:

Գրողները նորա թերթից
Հիշոցներով հալածված,
Չունեն մի տեղ մի թղթակից,
60 Որ չըլիներ վշտացած:

– Հայրի՛կ, հայրի՛կ, ինչ լավ եղավ՝
Այդ աստղերը վայր ընկան,
Հայրի՛կ, հայրի՛կ, այդպես մարդիկ
Մեր աշխարհքումն էլ չըկան:

65 – Ո՛հ, իմ դստրիկ, մի մասն են լուկ
Այդ աստղերը, որ ընկան,
Մեր երկնքում, գիտե՛ս արդյոք,
Որքան այդպես աստղեր կան: